

Headlines

- 1 प्रधानमंत्री नरेंद्र मोदी होरें गांधी जयंती कोला इक रोज पैहले अज्ज आयोजित स्वच्छता महाभियान च देश दी अगुवाई कीती। “स्वच्छता ही सेवा अभियान“ तैहत कोई 7 लक्ख कार्यक्रमें दा सरिस्ता कीता गोआ।
- 2 उपराज्यपाल मनोज सिन्हा होरें आखेआ ऐ जे स्वच्छता ही सेवा इक बड्डा जन आंदोलन बनी चुके दा ऐ। उनें ओ.डी.एफ प्लस दर्जा हासल करने पर जम्मू-कश्मीर दे लोकें गी मबारकबाद दिती।
- 3 उपराज्यपाल मनोज सिन्हा होरें इमानदारी कनै टैक्स भरने आलें दी सराहना कीती ते जम्मू-कश्मीर दे विकास च उन्दे योगदान गी उजागर कीता। टैक्स भरने दी प्रक्रिया गी सखल्ला बनाने लेई उनें टैक्स मैहकमे दी बी सिफ्त कीती।
- 4 सितंबर 2023 दौरान जीएसटी राजस्व दी कुल गराही 1 लक्ख 62 ज्हार 712 करोड़ रपे दर्ज कीती गई।

<><><><><><>

PM-Swachhta

प्रधानमंत्री नरेंद्र मोदी होरें अज्ज मुख भरै च चलाए गेदे “स्वच्छता ही सेवा“ महाअभियान दी अगुवाई कीती। मोदी होर तंदरूस्ती बारै सिखलाई ते मार्गदर्शन देने आले मन्ने-परमन्ने दे फिटनेस ट्रेनर अंकित बैयानपुरिया हुंदे कन्नै सफाई अभियान च शामिल होए। इस मौके मोदी होरे अंकित बैयानपुरिया कन्नै गललबात बी कीती ते शारीरिक ते मानसिक नरोएपन गी बनाई रखने दी जरूरत पर जोर दिता। प्रधानमंत्री होरें सफाई अभियान दे दौरान अंकित बैयानपुरिया कन्नै होई दी गललबात दा वीडियो बी सोशल मीडिया पर सांझा कीता। स्वच्छता लेई “एक तारीख, एक घंटा, एक साथ“ दे प्रधानमंत्री हुंदे आह्वान तैह्त् अज्ज मुख भरै च समाज दे बक्ख-बक्ख वर्गें दे लोकें इस अभियान च शिरकत कीती ते बजारें, गलिएं-महल्लें, रेल पटरीएं, नदिएं तलाएं, धार्मिक थारें, दफ्तरें, स्कूलें, कालजें ते होरनें संस्थानें ते सार्वजनिक थारें पर सफाई गतिविधिएं च शिरकत कीती। बीजेपी दे राष्ट्री अध्यक्ष जे.पी नड्डा, केंद्री मंत्री भूपेंद्र यादव, धर्मेंद्र प्रधान, डा. जितेंद्र सिंह, हरदीप सिंह पुरी, मीनाक्षी लेखी, राजीव चंद्रशेखर ते होरनें केई लीडरें बी इस महाअभियान च हिस्सा लैता। इस अभियान च देसै दे शैहरी ते ग्रामीण इलाकें दे 6 लक्ख 40 ज्हार कोला मतिएं थाहरें पर लोकें सफाई करिए श्रमदान कीता।

LG-Swachhta

जम्मू-कश्मीर केंद्र शासित प्रदेश दे उपराज्यपाल मनोज सिन्हा होरें श्रीनगर च इक घंटे दे श्रमदान स्वच्छता अभियान च शिरकत कीती ते डल झील चा जडी ते घाह-ब्रूट बाहर कडुने दे कम्मै दी अगुवाई कीती। एल.जी हुंदी अगुवाई च समाज दे बक्ख-बक्ख वर्गें दे लोकें सफाई अभियान च शामिल होइयै राष्ट्रपिता महात्मा गांधी होरें गी स्वच्छांजली भेंट कीती। उनें लोकें अगुई अपील कीती जे ओ भारत गी कचरामुक्त ते पूरी चाल्ली साफ-सुथरा राष्ट्र बनाने दे लक्ष्य गी हासल करने च अपना योगदान देन। एल.जी होरें आखेआ जे प्रधानमंत्री नरेंद्र मोदी हुंदे मार्गदर्शन हेठ स्वच्छता अभियान हून इक जन आंदोलन बनी चुके दा ऐ जिसी “स्वच्छता ही सेवा“ दा नारा देइयै मता असरदार बनाया जा रदा ऐ ते इस मुहिम गी कामयाब बनाने च जम्मू-कश्मीर केंद्र शासित प्रदेश बी पूरी शिद्दत कन्नै अपना योगदान देआ करदा ऐ। उनें आखेआ जे एहू स्हाडे सबबनें दी सांझी जिम्मेदारी ऐ जे अस अपने आंड-गोआंड, अपने पहाडें, मैदानें, झीलें, तलाएं-नदिएं, हर थारै गी साफ-सुथरा रखचै। उनें जम्मू-कश्मीर दे 100 प्रतिशत गाएं गी इक आदर्श श्रेणी तैहत पैहले खुल्ले च शौच दे चलन कोला पूरी चाली मुक्त ते फही ओ.डी.एफ प्लस दा दर्जा हासल करने पर जम्मू-कश्मीर प्रशासन ते आम जनता गी बी मबारकबाद दिती।

<><><><><><>

MP-Jugal

जम्मू प्रांत दे बी सब्बनें जिलें, शैहरें-नगरें ते ग्राएं च “स्वच्छता ही सेवा” अभियान तैहत बड्डे पैमाने पर लोकें स्वच्छता मुहिम च हिस्सा लैता। जम्मू शैहरा दे बस अड्डे पर लोआए गेदे इक कार्यक्रम च जम्मू-पुंछ हलके थमां सांसद जुगल किशोर शर्मा होरें हिस्सा लैता ते लोकें कन्नै मिलिए इलाके दी सफाई च श्रमदान दित्ता।

पुंछ जिले च बी पुराने पुंछ इलाके च सुभाष चंद्र बोस पार्क च केंद्री संचार ब्यूरो आस्सेआ स्वच्छता ही सेवा अभियान चलाया गेआ। डोडा जिले च आयोजित स्वच्छता कार्यक्रम च मकामी लोकें ते विद्यार्थिं सफाई गतिविधिं दे इलावा इक रैली कडिए बी लोकें गी जागरूक कीता। कठुआ च जिला सतह पर लोआए गेदे स्वच्छता अभियान दी अगुवाई डिप्टी कमिशनर राकेश मिन्हास होरें कीती। साम्बा दे जिला विकास कमिशनर अभिषेक शर्मा होरें जिले च आयोजित इक कार्यक्रम दौरान आखेआ जे स्वच्छता स्टाडे सब्बनें दी सांझी जिम्मेदारी ऐे जिसी ईमानदारी कन्नै निभाइए अस्स खुशहाल ते साफ-सुथरे माहौल च जीन जी सकने आं। उधमपुर जिले च आयोजित इक कार्यक्रम दौरान जिला विकास कमिशनर सिलोनी राय होरें दस्सेआ जे जिले च 7 ज्हार कोला मतिएं थारें स्वच्छता महा अभियान तैहत लोकें श्रमदान कीता।

<><><><><><>

Solar-Mission

भारत दा पैहला सौर मिशन आदित्य एल-1 धरतै थमां 9 लकख 20 ज्हार किलोमीटर दी दूरी पार करी चुके दा ऐे ते हुन एह सूरज ते धरतै मझाटै स्थित एल-1 प्वाइंट बक्खी अगगे बधै करदा ऐे। एल-1 प्वाइंट धरतै थमां 1.5 मिलियन किलोमीटर दूर ऐे। सोशल मीडिया साईट X पर अपनी पोस्ट च इसरो नै एह जानकारी सांझी कीती ऐे।

<><><><><><>

School-Timings

जम्मू-कश्मीर दी सरकारै श्रीनगर च मुंसिपल हद् दे अंदर ते जम्मू संभाग च सोए आले ज़ोन हेठ औने आले सब्बनें स्कूलें दे समें च अज्जै थमां बदलाव दा हुकम दित्ता ऐे। आकाशवाणी दे जम्मू संवाददाता दी रिपोर्ट मुजब जम्मू ते कश्मीर दे स्कूली शिक्षा निदेशालयें इस सरबंध्यै च बक्खरे-बक्खरे हुकम जारी कीते न ते स्यालें दौरान स्कूलें दा समें बड्डुलै 9 बजे थमां दपैह्नी 3 बजे तगर तय कीता ऐे। ऊआं ग्रामीण इलाकें च स्कूलें दा समें बड्डुले 10 बजे थमां दपैह्नी मगरा 4 बजे तगर कीता गेआ ऐे। तोआई जम्मू संभाग दे स्याले आले ज़ोन दे शिक्षा इदारें दा समें अज्जै थमां बड्डुलै 10 बजे शा दपैह्नी मगरा 4 बजे तगर करी दित्ता गेआ ऐे। इस हुकमै दी खलाफवर्जी करने आले स्कूलें खलाफ सख्त कार्रवाई कीती जागा।

<><><><><><>

LG-Gov. GST

उपराज्यपाल मनोज सिन्हा होरें कर्तव्य नांऽ दी टैक्स जागरूकता पैहलकदमी तैहत इंस्टीच्यूट आफ चार्टर्ड अकाउंट्स ऑफ इंडिया कन्नै सैहमति पत्रै पर दस्तखत करने पर जम्मू-कश्मीर दे टैक्सें सरबंध्यै मैहकमे गी मुबारकबाद दित्ती ऐे। मती असरदार, पारदर्शी ते उचित अप्रतक्ख टैक्स बवस्था स्थापित करने दे मकसद कन्नै श्रीनगर दे एस.के.आई.सी.सी च इस सैहमति पत्रै पर दस्तखत कीते गे। एल.जी होरें इस मौके पर मेरा बिल मेरा अधिकार प्रतियोगिता दे जेत्तुएं गी सम्मानित बी कीता। सिन्हा होरें आखेआ जे जम्मू-कश्मीर च हासल होआ करदे जीएसटी राजस्व दी दर राष्ट्री दर कोला बड्डी मती ऐे। उनें आखेआ जे समाजी बरोबरी दे कन्नै आर्थिक विकास गी बढावा देने लेई पिछले किश बरें दौरान कीते गेदे सुधारें दे चलदे एह मुमकन होई सकेआ ऐे। उनें आखेआ जे नमीं नीतिएं, शासन च मती पारदर्शिता ते भ्रश्टाचार खलाफ पुट्टी गेदी गैई नै बपार-कारोबार लेई बड्डा साज़गार माहौल कायम कीता ऐे। सिन्हा होरें जम्मू-कश्मीर दे विकास च ईमानदार करदाताएं दे योगदान दी सराहना कीती ते टैक्सें सरबंध्यै प्रक्रिया गी सौक्खा बनाने लेई सरबंधत मैहकमे दी बी सिफ्त कीती। उनें सरबंधत मैहकमें ते आम लोकें गी अपील कीती जे ओहू औद्योगिकरण गी बढावा देने ते जम्मू-कश्मीर गी विकास दा इंजन बनाने लेई रचनात्मक भूमिका अदा करना। मुख् सचिव डाक्टर अरूण कुमार मेहता ते होर बी केई बड्डे एहलकार इस मौके उत्थे मजूद हे।

GST-JK

इस बरे सितंबर म्हीने सरकार गी 1 लख 52 ज्हार 712 करोड़ रुपें दा सकल जीएसटी राजस्व हासल होआ ऐ जेदे चा 29 ज्हार 818 करोड़ रुपे केंद्री जीएसटी, 37 ज्हार 657 ज्हार 623 करोड़ रुपे संगठित जीएसटी दे ना जम्मू-कश्मीर नै जीएसटी दी गुराई च 32 फीसद दा बाद्दा दर्ज कीता ऐ। जम्मू-कश्मीर गी इस बरे 563 करोड़ रुपें दा राजस्व हासल होआ ऐ जदकि पिछले बरे एह रकम 428 करोड़ रुपे ही। उआं राश्ट्री स्तर पर पिछले बरे दे सितंबर म्हीने हासल होए दे जीएसटी राजस्व दे मुकाबले इस बरे दे सितंबर म्हीने 10 प्रतिशत मता जीएसटी राजस्व हासल होआ ऐ। इस म्हीने घरेलू लैन-देन थमां हासल जीएसटी राजस्व, पिछले बरे दी इससै अवधि दे मुकाबले च 14 फीसद मता ऐ। माली बरे 2023-24 च ऐसा चौथी बारी होआ ऐ जिसलै सकल जीएसटी दी गुराई 60 लख करोड़ दे आंकड़े गी पार करी गई ऐ।

<><><><><><>

CRPF

स्वच्छ भारत मिशन दे बैनर हेठ सी.आर.पी.एफ. दी 84 बटालियन पास्सेआ रामबन जिले दे बटोत ते चंद्रकोट इलाके च बड़े पैमाने पर स्वच्छता मुहिम दा आयोजन कीता गेआ। कमांडेंट एन. रणबीर सिंह ते सैकेंड इन कमान ए.के दीक्षित होरें अभियान दी अगुवाई कीती जेदे च 100 कोला मते अफसरें, मतैहत अफसरें, जवानें ते होरनें कर्मिणं शिरकत कीती। “कचरा मुक्त भारत” दे लक्ष्य तैहत जामिया मस्जिद चंद्रकोट, बटोत ते जरनैली सड़कै दे आले दोआले दे इलाकें च घाह ते जड़ी साफ कीती गई, मोमी लफाफे ते कूड़ा-कचरा साफ कीता गेआ। 84 बटालियन दे कोई 200 कोला मते प्रतिभागिणं, स्कूली बच्चें, रामबन पुलस कर्मिणं ते मकामी लोकें बी इस सफाई मुहिम च हिस्सा लैता।

M.P.Khatana

प्रधानमंत्री नरेंद्र मोदी हुंदे “एक तारीख, एक घंटा, एक साथ” आले आह्वान दे तैहत राज्यसभा सांसद इंजीनियर गुलाम अली खटाना होरें पुंछ च चलाए गेदे इक स्वच्छता अभियान च शिरकत कीती। इस मौके उनें आखेआ जे अपने आले दोआले दे इलाके गी साफ-सुथरा रखना राश्ट्रपिता महात्मा गांधी होरें गी सच्ची श्रद्धांजलि ऐ जिनें रमानदारी, सच्चाई, अहिंसा ते समाजी बरोबरी लेई संघर्ष करने दे कन्नोकन्नी स्वच्छता दा पैगाम बी देशवासिणं गी दित्ता। खटाना होरें आखेआ जे महात्मा गांधी होरें समाज च साफ-सुथराई ते स्वच्छता दे महत्वै गी उजागर करने लेई सफाई कर्मचारिणं ते होरनें ओकड़े लोकें गी हरिजन नां दित्ता हा जिनेंगी समाज च अछूत आखेआ जंदा हा।

<><><><><><>